

Memoria xustificativa do convenio de colaboración entre a entidade pública empresarial Augas de Galicia e o Concello de Vilaboa para a asunción por Augas de Galicia da xestión da estación depuradora de augas residuais de Riomaior e da prestación do servizo de depuración.

1. Antecedentes

O 26.06.1997 o Concello de Vilaboa solicitou a colaboración técnica e financeira da Administración autonómica para a execución das obras da EDAR de Riomaior, incluída na obra do saneamento integral do fondo da ría de Vigo, de acordo co disposto no entón vixente Decreto 84/1997, do 10 de abril, de colaboración técnica e financeira da Administración hidráulica de Galicia coas entidades locais en materia de abastecemento e saneamento de augas. A dita solicitude foi ampliada polo Concello de Vilaboa con data do 20.03.1998.

Logo da tramitación correspondente, a colaboración foi aprobada por resolución do presidente de Augas de Galicia do 11.05.1998 e autorizada por acordo do Consello da Xunta de Galicia.

No marco da colaboración acordada, a Administración autonómica licitou e executou o correspondente contrato de obra, de clave OH.336.343. Unha vez rematada a súa execución, as obras foron recibidas en conformidade o 26.04.2002 e postas a disposición do Concello de Vilaboa o 07.05.2002 para a súa xestión, conservación e mantemento de acordo cos termos da colaboración acordada, non obstante, a entidade local nunca chegou a asumir a dita xestión, sendo que o servizo municipal de depuración a través desta infraestrutura vén sendo prestado desde entón pola Administración autonómica.

No ano 2020 e con motivo do remate da vixencia inicial do contrato de xestión de servizo público OH.336.629 XSP, a través do cal Augas de Galicia viña xestionando a infraestrutura, o Concello de Vilaboa solicitou a continuidade desta xestión autonómica, formalizándose o 09.12.2020 un convenio de colaboración entre ambas administracións a fin de regular os termos da dita xestión. O convenio foi obxecto dunha addenda o 05.06.2022, prorrogándose o seu prazo de vixencia ata o 09.08.2024.

De xeito correlativo, Augas de Galicia prorrogou o contrato de xestión de servizo público para a explotación, conservación e mantemento da EDAR de Riomaior (OH.336.629 XSP), establecéndose como data de finalización do contrato o 09.08.2024.

Con data do 07.08.2023, no marco do disposto na disposición transitoria primeira da Lei 1/2022, do 12 de xullo, de mellora da xestión do ciclo integral da auga (LMXCIA), o Concello de Vilaboa solicitou a Augas de Galicia a continuidade da xestión



autonómica da estación depuradora de augas residuais (EDAR) de Riomaior, instando a tramitación dun novo convenio de colaboración.

2. Obxectivos que se pretenden

É obxecto do convenio establecer as condicións nas que Augas de Galicia asumirá, en calidade de entidade prestadora de servizos e nos termos establecidos na Lei 1/2022, do 12 de xullo, de mellora da xestión do ciclo integral da auga, a xestión da estación depuradora de augas residuais de Riomaior e dos seus equipos e instalacións.

3. Necesidade da colaboración, razóns de oportunidade e xustificación da non concorrencia

O servizo de tratamento de augas residuais urbanas é un servizo de competencia municipal, establecida nos artigos 25.2 c), 26.1 a) e 86.2 da Lei 7/1985, do 2 de abril, reguladora das bases do réxime local; nos artigos 80.2 l) e 81 a) da Lei 5/1997, do 22 de xullo, reguladora da Administración local de Galicia; e que tamén recolle a Lei 9/2010, do 4 de novembro, de augas de Galicia, nos seus artigos 5 e 27, no reparto de competencias entre as diferentes administracións públicas de Galicia en materia de infraestruturas hidráulicas.

O artigo 24.2 da Lei 9/2010, do 4 de novembro, de augas de Galicia, a actuación das administracións autonómica e local terá como finalidade, en materia de saneamento e depuración, contribuír á consecución do bo estado ecolóxico das augas e dos seus ecosistemas asociados; mentres que o artigo 21 da Lei 1/2022, do 12 de xullo, establece que Augas de Galicia pode ostentar a calidade de entidade pública prestadora de servizos no ámbito do abastecemento, saneamento e depuración, colaborando coas administracións públicas responsables dos servizos, a fin de garantir a subministración de auga en calidade e cantidade axeitadas e contribuír á consecución do bo estado ecolóxico das augas.

Dito o anterior, Augas de Galicia poderá formalizar os convenios que sexan precisos coas entidades locais para conseguir os obxectivos das políticas de saneamento e depuración fixados, no ámbito de colaboración e cooperación que debe presidir as relacións entre administracións, tal e como se recolle no artigo 30 da citada Lei 9/2010, do 4 de novembro, de augas de Galicia.

Polo exposto, estímase xustificada a utilización do instrumento do convenio para articular a colaboración de referencia, quedando o devandito convenio fora do ámbito de aplicación da Lei 9/2017, do 8 de novembro, de contratos do sector público, de acordo co establecido no artigo 6 da antedita lei.

4. Estimación de custos e financiamento



O custo estimado para a explotación da estación depuradora de augas residuais de Riomaior estímase en 279.012,84 euros anuais máis IVE (10%), ao que deben engadirse os custos de subministración eléctrica, que se estiman en 69.831,81 euros (IVE excluído).

Para o financiamento do importe da explotación Augas de Galicia dispón de crédito suficiente e axeitado retido na conta 6299 "Outros servizos exteriores" do Plan xeral de contabilidade pública de Galicia. Para o financiamento do importe da subministración eléctrica Augas de Galicia dispón de crédito suficiente e axeitado retido na conta 6280 "Energía eléctrica" do Plan xeral de contabilidade pública de Galicia.

Se ben a estimación de custos e o seu financiamento son os indicados, cómpre poñer de manifesto que estes gastos se contabilizan e imputan nos correspondentes procedementos de contratación de xestión do servizo público de explotación da depuradora.

Augas de Galicia vén explotando a EDAR de Riomaior, no termo municipal de Vilaboa ao abeiro do contrato de xestión de servizo público de explotación da estación depuradora de augas residuais de Vilaboa. Vilaboa (Pontevedra), de clave OH.336.629/M2, contrato que está prorrogado e cuxa última prórroga finaliza o vindeiro día 31.03.2025.

Para a explotación no futuro da EDAR de Riomaior Augas de Galicia licitou o contrato servizo de explotación, mantemento e conservación das estacións depuradoras de augas residuais de Ponte Caldelas, Comboa e Riomaior. Ponte Caldelas, Soutomaior e Vilaboa (Pontevedra), de clave AUG-2025-0001, cun prazo de execución de vinte e catro (24) meses, prorrogable ata un máximo de trinta e seis (36) meses, un orzamento base de licitación de 1.651.653,45 euros (incluído IVE) e un valor estimado de 3.602.032,85 euros (excluído IVE).

Os gastos correspondentes á subministración eléctrica da EDAR de Riomaior non están incluídos no importe de licitación porque está prevista a incorporación desta subministración ao contrato centralizado de enerxía eléctrica da rede de enerxía da Xunta de Galicia (Redexga), sendo comunicada a dita previsión ao órgano xestor da Redexga.

Para a tramitación deste convenio, tense observado o cumprimento dos requisitos establecidos na Lei 40/2015, do 1 de outubro, de réxime xurídico do sector público.

Santiago de Compostela, asinado dixitalmente
O director de Augas de Galicia
Roi Fernández Añón

